

Band XI., Nr. 5259, Seite 232

*Anselm von Justingen beurkundet die schiedsrichterliche Entscheidung
verschiedener Streitigkeiten mit Kloster Zwiefalten.*

Justingen, 1299. April 20.

Wir her Anshaln von Justingen vergehin offenbar an dîsem gegenwartigen brief, daz wir unser liehenschaft und unser ehaftin, die wir heiten zo dem gote ze Emeringen, daz her Wolf vom Stein heit an ackern an wisen an holze an velde und geimæinlich swaz dar zo durch reht gehôret, uns verzihen mit disem brief und ganzlich uf geiben dem ersæmen closter ze Zwiveltûn unz zeianem seil geraht und ûnserr vordem umb daz, ob wir ez ie geschadegetin mit kainer slahte sache. Mit worten ist och beschaiden, daz wir mit dem vor geinantten closter Zwiveltûn sûn gemain hân erschaze vâlle beseizen und entsezen dar uber wir vogt sigen ze Justingen ze Ingesteten. Man sol och wissen, als mit worten bedinget ist, daz . . der abbe und diu samenunge dez selben closterz uns und useren erben aigenlich geiben han den berch und die halden, diu geimanlich genemmet ist diu Langhalde. Dez sint gezûge und schaitlûtte gewesen: her Swigger der Lange, her Cûnrat, her Berhtol gebrûder und eirbar ritter, die von Gundelvingen sind genant, und gnuch anderr erbar lûte den billich ist ze glûbende.

Dirre brief wart geben ze Justingen, do man zalt von gûttez geburte tusen jar zwai hundert jar nûwnzich jar und nûwn jar, an dem mæntag in der osterwochen. Und daz diz veste und steit belibe vor allen unsern nach kûmenden, so geiben wir der vor genantte her Anshaln von Justingen dem vor genantten . . abbe und der samenunge ze Zwiveltûn disen brief beinsigelten mit unserm insigel.

Der Textabdruck folgt dem Original.

Bruchstück des Siegels, s. WUB, Bd. VIII, S. 255.

Überlieferung und Publikationen

Lagerort:

HStA Stuttgart

Signatur/Titel des Originals:

H 551 U 489

Überlieferung und Textkritik:

Auch im Kopialbuch HStA Stuttgart H 14 Nr. 367, S. 6. War im 1944 durch Fliegerangriff verbrannten Kopialbuch HStA Stuttgart H 14 Nr. 361, S. 120b.

Weitere Angaben

Sprache:

Deutsch

Ausstellungsort:

Justingen

Aussteller:

Anselm; von Justingen

Ortsindex:

Emeringen Wohnplatz (16804)

Emeringen, UL

Gundelfingen Wohnplatz (15913)

Gundelfingen, Münsingen, RT

Ingstetten Wohnplatz (16937)

Ingstetten, Schelklingen, UL

Justingen Wohnplatz (16938)

Justingen, Schelklingen, UL

Rechtenstein Wohnplatz (16926)

Rechtenstein, UL

Zwiefalten Wohnplatz (16028)

Zwiefalten, RT